

## Puonevalio neatims

Keista šiās metās ta žēima. Groudė galė, prīš Kaliedas, paspaudė šaltielis vėrš dvėdešimtėis laipsniu. Vo po Kaliedu, ka pridriebė snėiga, oi, oi, oi... Ēr Naujū metū solaukė ne vėsė, ėš tuoliau negaliejė atvažioutė – kelius ožpostė. No sausie notėrpa snėigs, pradiejė kuožna dėina lītė. Prasidejė tvanā. Ne mondriesnis ėr vaseris. Vėina dėina ĩr padoresnė, vo po naktėis viel pliaup. Vaserė galė apėntās lėgo panaši ė žēima. Tiktā dėdėlė viejė draskies.

Juonis so Petrio viel sosėtėka pėinienie. Atėdavosio pėina, abodo draugėškā patraukė ont nomū.

– Kāp tau atruoda, a stuosem ė tuo Auruopas sajunga? – prabėla Juonis.

– No a dorns ėr esi! Kas mūsa teiraujės, a mes nuorem, a ne? Kāp valdiuos vīrā nosprendė, tēp ėr bus, – pīkteliejės žėnuova balso atriežė Petris.

– Noj noj, pėnkėsdešimt metu sajunguo buvuom, nojau ėr viel kėta sajunga. Skėrtoms tėk tuoks, ka ana sajunga bova rauduona, vo ši, biosos žėna kuoki bus, mielėna a žali, – nelinksmā ėštarė Juonis.

– A to mėsłėji, ka bus prastiau?

– No rasintās ėr geriau, bet mon nepatink, ka ožsėinietė sopėrks žemės, sokors dvarus, vo mes lėksem kometės. Seniau bova kulkuozā, dabā bus dvarā.

– Ē, ka to rokoujis, kap pasomdīts! – nejoukās sopīka Petris. – Juk je nenuoriesi – nepardousi tuos žemės. Puonevalio nieks neatims.

– No kāp jau bus tēp. Kap grajėj, tēp ėr šuoktė rėk, – degdams cėgarieta, sampruotava Juonis.

Vīrā valondelė notraukė ruoda ėr kolniava be žuodiu. Nuėjos kuoki gala, Juonis viel kreipies ė Petri.

– Aš veizo, ka pats ė žvejība nevažiouji?

– Ē ka to mon šėndėina grajiji ont nervu! Pats matā, kuoki opė ĩr ėštėvėnusi. Kame tou žovi sogausi, ka pėlnas lonkas ondėns, – sosėnervava Petris.

– Va va, tėkrā, ėr par televizuorio ruodė, ka ĩr dėdėlė tvanā aple Kartena ėr Šėlotė. Saka, ka tėn žovū sogaun ėr truobuo.

– Dīva nier. Tėn ĩr žovings krašts. Jėgo ožtvints lėg longū, anuos ėr truobuo praded plaukiuotė. Tik gaudīk ėr diek ėe pat ė petelnė.

– No tad lig rītuojaus, – patapšnuojės Petriou par peti, atsėsveikėna Juonis ėr pasoka ė sava kėimali.